

Comunicado di oficina di Gobernador na comunidad

Gobernador a pidi sr. Eman pa acepta e funcion di formado

Preferiblemente e gobierno aki lo mester dirigi su mes den sigui sostene e crecimiento economico, pa cua e fundeshi a keda estableci caba durante e periodo di gobernacion anterior. E reto pa e gobierno nobo lo ta pa capitalisa e inversionnan di e ultimo cuater añanan. Bienestar di tur habitante di Aruba y un mejoracion duradero di calidad di ambiente di bida lo mester keda central.

P'esey ta recomendabel, tambe pa sigui fortalece e cohesion social, manera cu a haci esaki cu partneman social durante e ultimo periodo di gobernacion, pa enfrenta e retonan aki hunto cu henter poblacion. E gobierno nobo cu lo bay forma particularmente lo por uza fortificacion di enseñansa y bienestar di nos conciudadanan como catalisado.

PILAR ECONOMICO NOBO

E relacion cu a mehora cu otro paisnan den Reino tambe lo por brinda un contribucion positivo. Desaroya e pilar economico nobo den forma di posiciona Aruba como un brug entre Europa y Sur America, sosteni pa iniciativanan riba tereno di fuentenan di energia renoba ta un bon ehempel di esaki. Ta obvio cu lo mester inclui e maneho aki tambe den e programa di gobernacion di e gobierno cu lo tin cu forma.

ESFUERSO FINANSA PUBLICO

Banda di e retonan menciona caba a resulta cu durante e consultanan cu Gobernador a tene, financia publico tin

mester di atencion.

Pasobra, maske economia di Aruba no ta asina malo, entre otro pa motibo di inversionnan y escogencianan di maneho describi anteriormente, y a pesar di desaroyonan internacional menos positivo cu ainda ta indica un crecimiento, mester sigui haci esfuerso den direccion di un financia publico duradero.

NO MAS CU 7 MINISTER
E cifranan cu a keda presenta na Gobernador a indica cu mester ta discreto cu inversionnan cu medianan di gobierno den e proximo añanan. Pa e motibo aki, e gabinete cu mester bay forma y mescos tambe e gobierno demisionario actual, preferiblemente lo no por consisti di mas cu shete minister.

STABILIDAD NECESARIO

For di e datonan cu a keda entrega na Gobernador lo por conclui cu hustificacion di e crecimiento economico, proyecta den combinacion cu escogencianan fundamental di maneho cu lo mester conduci na un aumento di entradanan y reduccion di e gastonan den e sector colectivo, ta esencial pa duna e estabilidad necesario na financia publico pa asina por yega na un presupuesto balansa riba cierto termino.

DIFERENTE INSTITUCION

Ora haya solucion pa e reto aki, ideal lo ta pa e gabinete nobo scoge pa traha den cooperacion cu diferente institucion cu ta ocupa nan mes cu maneho di, investigacion di y supervision di financia

publico.

AUMENTO DI EDAD DI PENSIOEN

Internationaal Monetair Fonds (IMF) a presenta algun sugerencia pa medida caba. Banda di esaki, for di e consultanan cu a tene, a bini un imagen padilanti cu principalmente e aumento di edad di derecho riba pensioen lo tin un efecto positivo riba e peso di gastonan di e pais riba termino largo.

REFORMACION DI E FONDO

E crecimiento rapido di expectativa di bida di habitantenan di nos pais y e situacion den cua e fondo di AOV ta aden na e momento aki, ta duna motibo pa haci escogencianan di maneho den forma energico pa cu reformacion di e fondonan social aki, pa asina por yega na nota e efectonan riba termino cortico caba.

GASTO PERSONAL

Ademas, tumando nota di e parti grandi di e gastonan di personal den e presupuesto di nos pais, atencion riba reformacion di e pakete di tarea di gobierno y e cantidad di miembronan di personal, lo por conduci potencialmente na un maneho pa limitacion di e gastonan.

STRUCTURA E APARATO GUBERNAMENTAL

Un reflexion riba e forma con pa logra y estructura e aparato gubernamental, cu e fin pa aumenta e eficiencia di formacion y ehecucion di maneho, lo por tin un efecto positivo duradero riba e nivel di gastonan, y esaki por cuadra den



e formacion di decision di e gabinete cu lo mester keda forma.

Pa haci e escogencianan necesario di maneho cu ta basa riba esaki, gobierno lo mester percura pa esaki tuma luga na un manera balansa y coordina, den cua bienestar di habitantenan di Aruba, tanto di e generacion actual como di esun di futuro, ta keda central.

EHECUTA TAREANAN INDEPENDIENTEMENTE

E gobierno nobo, mescos cu tur e otro gobiernonan anterior, lo funciona denter di e derecho di estado democratico, tal manera cu esaki ta estableci den nos constitucion. Un papel importante denter di e constitucion aki ta reserva pa diferente institucionnan di garantia cu ta percura pa "checks and balances" di e sistema.

Gobernador a exorta su speranza y expectativa cu e gobierno cu lo mester bay forma, cu e lo duna e institucionnan aki tur e espacio y e sosten necesario cu nan tin mester pa nan por ehecuta nan tareanan cabalmente y tambe indepen-

dientemente.

INSTITUCION OMBUDSMAN

Tambe el a pidi informador pa considera, pa inclui den e programa di gobernacion di e gabinete cu ta den formacion, e institucion ombudsman, mediante registracion di esaki den constitucion.

Introduccion di e institucion aki lo por brinda un contribucion grandi na ampliacion di transparencia y integridad di gobierno di nos pais.

APTITUD Y CAPACIDAD

Finalmente Gobernador a pidi atencion di formado pa cu Landsbesluit di dia 9 di september 2013 no. 1, den cua tin fiha stipulacionnan tocante hacimento di investigacion riba aptitud y capacidad di personanan kendenan ta candidato pa asumi e puesto di minister. Den esaki tin un tarea importante di guia reserva pa formado.

Gobernador a haci un suplica na formado pa cumpli na letra y spirito di e Landsbesluit aki y, segun stipula den articulo 6, pa informa gobernador tocante resultadonan di e investigacion. □